

REGIONAL NEWS BULLETIN

Date – 26/06/2024 Time - 18:30 -18:40Hrs

HEADLINES (EVENING)

- Chief Minister Pu Lalduhoman Mizoram mipui te chu ruihhlo leh dan lova ruihhlo phurh do hna thawhpuiah a sawm.
- Agriculture Minister Pu PC Vanlalruatan thlai thar pali te society kaltlanga lei tura ruahman mekah a hralhtu turte data July thla chhunga lakkhawm vek hman turin ruahmanna kalpui mek a ni, a ti.
- BJP hruaitu senior Om Birla chu vawiin khan Lok Sabha 18-na Speaker atan thlan a ni.
- Kenya-a chhiah lak dan thar duhlohna lantir zingah mi 5 chu police ten an kaphlum

<><><>

INTERNATIONAL DAY AGAINST DRUG ABUSE & ILLICIT TRAFFICKING

Chief Minister Pu Lalduhoman Mizoram mipui te chu ruihhlo leh dan lova ruihhlo phurh do hna thawhpuiah a sawm.

Vawiina International Day Against Drug Abuse & Illicit Trafficking, 2024 Aizawl Vanapa Hall a hmannaah he sawmna hi siamin Chief Minister chuan, state chhak lam ram thenkhatte chu khawvel hriata ruihhlo bupui, Golden Triangle an tih thin an ni a, chuta tanga ruihhlo lo chhuk thlakna kawngpuiah chuan Mizoram a awm avangin thalai tam takten a ngawl an lo vei phah a. Mitin huapa do ngai anih avangin kohhran hrang hrang leh tlawmngaipawlte, leh mipui zawng zawng thawhpuiah an sawm a ni, a ti.

Chief Minister chuan, Mahni fate drug laka an him theih nan chhungkua an pawimawh hle a, nu leh paten an fate thlithlai taima se, nun kawng dik an zawhna tur a nih phawt chuan khauh taka khuahkhirh hreh loh ni se a ti.

He inkhawm Chief Secy Dr Renu Sharma kaihhruaiah hian, ngawlvei te enkawlna lama thawk tha Padma Shri pahnih Pi B. Sangkhumi leh Pu Sangthankima te chawimawina hun hman a ni a; Social Welfare Minister Pi Lalrinpuii leh Excise & Narcotics Minister Pu Lalnghinglova Hmar te pawh an tel a, Minister dang Pu Lalthansanga Ralte, Prof. Lalnilawma, Adviser to CM Pu Lalmuanpuia Punte, Lt. Col. Clement Lalhmingthanga leh Pi Prova Chakma, MLA te, sawrkar official, tlawmngaipawl, kohhran aiawh leh zirlai naupang te an tel a ni.

Mizoram District hrang hrangah International Day Against Drug Abuse and Illicit Trafficking ni pual hian hun hman a ni a. Champhaiah chuan Champhai Police huaihawtin ‘Kan dinhmun a chiang e, invenna kawngah tan i la ang u’ tih

thupui hmangin hun hman a ni a, Champhai Police te ruihhlo man sa, cheng Vbch 30, Nuai 43 Sing 8 Sang 1 man hu halral a ni.

Mamit ah chuan DC Pu V.L Remliana hovin DC Conference Hall ah hman a ni a. He hunah hian kalkhawmte atangin ruihhlo do leh a kaihnawih hrang hrang laka fihlim tura inzirtirna neih a ni.

Khawzawlah International Day Against Drugs Abuse and Illicit Trafficking, 2024 chu Khawzawl DC Auditorium-ah Khawzawl DC Pu K Lalrohlua kaihhruaina a hman a ni a, he ni pual hian Khawzawl District Coordination Center (NCORD) te chuan Khawzawl a De-addiction Home pahnih Grace Camping Center leh Chhanchhuahna Home te chu an Chairman Pu Lalrohlua hoin an tlawh a, tanpuina pawisa fai cheng 5000 ve ve an hlan a ni.

Vawiin vek khan Saitual ah Saitual District Police te chuan International Day against Drug abused and Illicit trafficking pualin District Higher Secondary school, Keifangah leh Ngopa Secondary School ah Drugs Awareness Campaign an nei a, Zirlai naupangte chuan damdawi/ruihhlo ti lo tura intiamna 'Signature Campaign' an nei nghal a ni.

International Day against Drug Abuse & Illicit Trafficking pualin vawiin khan cheng vbc 140 leh nuai 80 vel hu ruihhlo an hman te an tiral a,

Ruihhlo te hi Aizawl Zoological Park, Lungverh, Aizawlah incinerator hmangin an halral a. CID Crime, Aizawl DEF, Saitual DEF, Hnahthial DEF leh Lunglei DEF ten ruihhlo an man sa te an ni a, IGP Pu Lalbiakthanga Khiangte chuan he hun hi a hmanpui a, Mizoram Police te chu ruihhlo dona kawnga tan la zel turin a fuih a ni.

Tunkar chhung hian district hrang hrang Police ten theihtawp chhuah in ruihhlo dona kawng ah hian hma a la tih sorkar thuchhuah chuan a sawi a. Thalaite leh mipui hnenah te Ruihhlo laka fihlim tura zirtirna (nasa takin a kalpui a. Awareness campaign hi Mizoram chhunga Zirna In hrang hrangah neih niin, Signature campaign pawh hmun eng emaw zatah neih ani bawk.

<><><>

AGRI MINISTER

Agriculture Minister Pu PC Vanlalruatan thlai thar pali Sawhthing, Aieng, Hmarcha leh Hmunphiah te society kaltlanga lei tura ruahmanna sorkarin a siamah July thla chhung hian a hralhtu turte data lakkhawm vek hman turin ruahmanna kalpui mek a ni, a ti.

Vawiin khan heng thlai thar pali hralh dan tur chungchanga sorkar ruahmanna puangin Agriculture Minister chuan he data lakkhawm naa inziak lut ve lote chu sawrkarin buaipui an ngaih hunah an tel ve thei dawn lo a ti a, chuvangin a hnua sawi sel a awm loh nan heng thlai thar hralh tur neite chu inziak lut vek turin a chah tih a sawi a ni.

Pu PC Vanlalruata chuan thlai thar lei tur hi Society kaltlang khera tih an tum tih sawiin, hei hi loneitu te hlawkna tur zawk a ni a ti a, Hmunphiah bik hi Land Resources, Soil & Water Conservation Department ten a lak khawm hna an thawk meka, Thlai pathum-Sawhthing, Aieng leh Hmarcha te chu Horticulture Department ten Society leh Village Council te kaltlangin khaw hrang hrangah a lakkhawm hna an thawk tan mek bawk a ni, a ti.

Tunah hian khawpuia mihausa thenkhat ten sawhthing an ching nual niin an hria a, heng hi an mimal zalenna a ni a, cheng 50/- aia toa an hralh theih phawt chuan an duhsak em em tih sawiin, Amaherawhchu, society member nilo, thingtlang

khuaa Aadhaar card/Voter ID neilo chu cheng 50/- a sawrkarin leisak a ngaih tak tak chuan an buaipui zingah a tel thei kher lo ang a ti a, Address lanna Aadhaar leh Voter ID an ngaipawimawh hle dawn a. Chumi nei lo an nih pawhin society member an ni tur a ni, a ti.

An hmalakna hnuaiah hian, khawtinah Multipurpose Primary Agriculture Credit Society (MPACS) lo in din tur leh sawrkar official-te tha taka lo tawiawm turin an inhriat tir tih Minister chuan a sawi a, Society chu sawrkar kut ke ber tur an nih avangin an mawhphurhna a sang hle dawn a ti a, Society lo awm tawhsa rintlak a awm chuan fin mai kha a tha bera, rintlak a awm loh erawh chuan a thar din mai tur a ni a ti a. A hrechiang duh tan chuan Cooperation department lamah zawh fiah thei reng a ni tih a sawi bawk a ni.

<><><>

ASF

Vawiin khan Animal Husbandry and Veterinary Dept chhinchhiah danin Mizoramah vawk pulhri -African Swine Fever (ASF) vangin vawk 178 thiin vawk 282 suat a ni a.

ASF vang hian Mizoramah kumin January thla atanga vawiin thleng khan vawk 3658 thi nia report a ni a, vawk suat tawh zawng zawng hi vawk 7069 a ni tawh a. Vawiin bika vawk thi zat hi Aizawl District ah vawk 116 a ni a, Serchhip District ah vawk 6 leh Saitual District ah vawk 56 a ni a. Tihian vawiina Mizoram chhunga vawk thi zat hi vawk 178 a ni a.

Vawiin vek khan Mizoram chhungah vawk 282 suat a ni a. Aizawl District ah vawk 77 suat a ni a, Serchhip District ah vawk 43, Mamit District ah vawk 59, Saitual District ah vawk 22 leh Khawzawl District ah vawk 81 suat a ni bawk a ni a.

<><><>

SPEAKER

BJP hruaitu senior Om Birla chu vawiin khan Lok Sabha 18-na Speaker atan thlan a ni. Pu Birla hi voice vote hmanga thlan tlin a ni a. Tun tum hi Lok Sabha Speaker a nih tum hnihna tur a ni a. Thlan tlin anih hnu hian Prime Minister Narendra Modi, Leader of Opposition Rahul Gandhi leh Parliamentary Affairs Minister Kiren Rijiju ten Speaker thutnaah an hruai a ni.

Puan tawh angin vawiin Speaker thlannaah hian Opposition te chuan Congress MP K. Suresh chu Speaker chuh tur hian an nominate ve a ni.

Spekaer atana thlan tlin anih hnu hian Pu Birla chuan thusawiin an pe chu lawmthu a sawi a. Parliament rorelna zahawmna leh kalphungte a vawng nung zel dawn tih a sawi a ni.

Prime Minister Narendra Modi, Opposition Leader Rahul Gandhi bakah TMC MP Sudhip Bandhopadhya, Shiv Sena (UBT) leader Arvind Sawant, NCP (Sharad Pawar) MP Supriya Sule leh member dangten Speaker lawmpuina thu an sawi a ni.

<><><>

KENYA

Kenya-a chhiah lak dan thar duhlohna lantir zingah mi 5 chu police ten an kaphlum. Thudawn danin he buaina chhuak avang hian Parliament building thenkhat lai chu hal a ni a. Nairobi khawpuiah mipui lungawilote chuan Parliament venghimtu police rualte paltlangin hmun tam takah thil an ti chhia a. Police te chuan mipui pungkawm hnawtdarh tur hian silai hmetpuakin mi panga an thi a. President William Ruto chuan ram himna ti derthawng thei leh pawikhawih tumte chungah na taka an chet zel tur thu a sawi nghal a. Mipui pungkawmte dang tur hian sipai thahnem tak a tir lut tawh a ni.

Kenya ah hian chhiah lak dan thar kalpui tum niin chhiah lak zat tihpun a ni a. He dan thar hi duhlohna thawm a awm chhoh mek laiin nimin khan President chuan a pawmpui tak avangin buaina hi a punlun ta nia hriat a ni a. Khawvel hmun dang atang pawhin buaina chhuak mek chu an ngaihven hle a ni.

<><><>